

Euskal liburuak irakurri, gozatu eta oparitzeko kanpaina abian beste behin

Euskaltzaleen Topaguneak 'Irakurri, Gozatu eta Oparitu' egitasmoaren zazpigarren edizioa jarri du martxan, zenbait euskara elkarte, udal liburutegi eta liburu dendarekin batera, eta hainbat Udal, Eusko Jaurlaritzaren kultura saila zein Arabako, Bizkaiko eta Gipuzkoako Foru Aldundien babesarekin. Aurtengo kanpaina Goierriko bost herritan dago martxan, horien artean, Lazkaon. Kanpaina honek 5. urtea du aurtengoa Lazkaon eta Udal liburutegia, Gerriko liburudenda eta Goierriko Euskal Eskola Kultur Elkarteak antolatu dute elkarlanean.

«Aurreko urteetako datuak onak izan dira eta euskarazko irakurketa bultzatzeko kanpaina egokia dela baloratuta, aurtengoan ere antolatzea erabaki dugu», azaldu dute antolatzaileek. «Liburuak garestiak izan ohi direnez, krisi garai honetan aprobetxatzea merezi duen kanpaina da Irakurri, gozatu eta oparitu».

Irakurri, Gozatu eta Oparitu ekimena apirilaren 23an abiatu zen, Liburuaren Nazioarteko Egunean, eta Euskal Herri osoko 24 herritan egongo da ekainaren 30era arte. Irakurzaletasuna bultzatzea xede duen egitasmo honek herritarrak euskarazko liburuak irakurtzera animatu nahi ditu, irakurtzearen alde atsegin eta gozagarria azpimarratuz. Aurten gorakada nabarmena izan du egitasmoak, iaz baino 9 herri gehiagotan jarri baita martxan.

Zaletasuna sustatzeko

Kanpainaren izenak berak argi adierazten duenez, hiru pausu eman behar dira bertan parte hartzeko: Antolatzaileek aditzera eman dutenez «Lehenengo pausoa irakurtzea da; euskaraz irakurtzea. Horretarako, herriko liburutegi publikora joan, eta euskarazko edozein liburu maileguan eskatu ahal izango da.

Ondoren, gozatu «liburua irakurritakoan, liburutegira bueltatu, eta fitxa simple bat bete beharko da: zein izan den irakurritako liburua, zer inpresio eman digun eta abar. Fitxa hori beteta, liburuzainak erosketa-txekea emango digu, hitzartutako liburu dendan erabiltzeko». Eta gero «Oparitu. Azken pausua, liburua oparitzea da: lagun bati, senide bati, edo norbere buruari. Liburutegian jasotako txartelarekin, Gerriko liburudendan euskarazko beste edozein liburu erosterakoan %25eko deskontua izango da, edota %50a Gerriko kultur elkartearen kidea izanez gero».

Aurreko edizioetan bezala, apirilaren 23an abiatu da aurten ere 'Irakurri, Gozatu eta Oparitu' egitasmoa, Liburuaren Nazioarteko Egunean. Uda aurreko hilabeteak baliatzen dira egitasmoa sustatzeko, liburuen irakurketarako garai egokia baita. Bi hilabeteko iraupena izango du kanpainak eta ekainaren 30era arte egongo da abantailak baliatzeko aukera.

Esan bezala, aurten 24 herritan izango da ekimena, iaz baino 9 herri gehiagotan. Aurreko urteetan ikusi denez, kanpainak eragin positiboa du herritarrek liburutegi publikoan egiten duten euskarazko liburu mailegu erabileran. Izan ere, egitasmoaren helburuetariko bat da euskaltzaleak liburutegi publikoen erabiltzaile bihurtzea. Era berean, ekimenak liburuen salmentan izaten duen eragina ere kontuan hartzekoa da.

Irakurri, gozatu eta oparitu ekimenaren bueltan bestelako literatur jarduerak ere antolatuko dira, hala nola solasaldiak idazleekin, liburu azokak, irakurketa musikatuak eta abar. Egitasmoak Eusko Jaurlaritza eta Araba, Bizkaia eta Gipuzkoako Aldundien babesaz gain, honako argitaletxeen laguntza jasotzen du: Alberdania, Erein, Elkar, Ibaizabal, Pamiela, Txalaparta eta Susa. Euskaltzaleen Topagunea 1997an sortu zen, eta Araba, Bizkaia, Gipuzkoa eta Nafarroako 96 Euskara Elkartek osatzen dute. Elkarrean zein mugimenduaren beraren helburua euskararen erabilera sustatzea da. Horretarako, hainbat esparru lantzen dituzte, hala nola haur eta gazteen aisialdia, kulturgintza, tokiko hedabideak, mintzapraktika, entitateak euskalduntzea eta sentiberatzea.